

CARTA UU JA NI NTEE SAN PEDRO APOSTOL NUU NDA NCHIVI CANDIJA

1 ¹Maá nī cúu Simón Pedro, de cúu nī mozo Jesucristo, de cúu nī apóstol jā ní ntají yā. De téé nī carta yáhá cuēē nūū ndá nú jā ní nsāhá Yāā Dios jā inuú-ni nī nīhīn ndá nú jín ndá nī tūhun vii tūhun vāha jā cándija ó yā. Chi Yāā ndāā cúu Yāā Dios jín Jesucristo jā scácu yóhó.
²De ñúhún inī ni jā ná sáhá cā yā jā vāha ndasí ndá nú, jín jā coo ndeé coo siī inī nū sīquī jā jícūhun vāha inī nū nāsa Yāā cúu Yāā Dios jín Jētohō ō Jesús.

Siquī nāsa cánuú coo nchivī cándija

³De Yāā Dios jín poder yā nī jēhe yā nūū ō ndācá jā sáhá jā cuu caca ndāā ō nūū yā jín jā chiñúhún vāha ó yā. Chi nī stéhēn yā maá yā nūū ō, chi maá yā cúu jā ní ncana yóhó, sīquī jā ndasí cúñáhnú yā jín ndācá tiñu ñáhnú jā sáhá yā.

⁴Jā ñúcuán nī nquee yuhú yā ndācá jā ñáhnú ndasí de vāha ndasí jā sáhá yā yóhó, tácuā jín ndācá ñúcuán de nduu ndá nú tá cúu nūū íyó maá yā, de cācu nú nūū ndá tiñu néhén jā ndíyo inī nchivī jā sáhá ji inī ñayiví yáhá.

⁵Túsaá de nducú ndéé ndá nú jín tūhun yáhá. De jā cándija ndá nú, de sīquī ñúcuán chisó nú jā caca ndāā nū. De jā jīca ndāā ndá nú, de sīquī ñúcuán chisó nú jā cundihvī inī nū jícūhun vāha inī nū sīquī maá yā.

⁶De sīquī ñúcuán chisó nú jā casī nū jā cúni modo maá nú. De sīquī ñúcuán chisó nú jā cuandéé inī nū, de sīquī ñúcuán chisó nú jā chiñúhún vāha nú Yāā Dios.

⁷De sīquī ñúcuán chisó nú jā coo manī nū jín táhán nú, de sīquī ñúcuán chisó nú jā cundáhvī inī nū táhán nú.

⁸Chi tú cāyā ndá tiñu yáhá jín ndá nú, de suu sáhá jā má cútecū cāhá nú, chi sa quee vāha tiñu sáhá nú, sīquī jā jícūhun inī nū nāsa Yāā cúu Jētohō ō Jesucristo.

⁹De nchivī jāá nduú sáhá tiñu yáhá, cúu ji modo nchivī cuāá, chi nduú jícūhun inī ji tūhun yā, de ja nī naā inī ji jā ní nsāhá ndoo yā ji ndācá cuāchi jā ní nsāhá ji ichi chātā.

¹⁰Jā ñúcuán nducú ndéé ndá nú hermano, tácu coo seguro jā ní ncana yā ndá nú jín jā ní nacāji yā ndá nú. Chi tú sáhá nú ndācá tiñu yáhá, de mā cācá yátá cuiti nū.

¹¹Ñúcuán de nune vāha ichi jā quivi nú inī ñuū maá Jētohō ō Jesucristo, Yāā scācu yóhó, nūū tátúnī yā ní cání.

¹²Jā ñúcuán mā jéncuini ni jā nāndacu nī ndá tūhun yáhá nūū ndá nú, vísō ja jínī nū de íñi ñihin nú jín tūhun ndāā jā cándíja nú.

¹³Chi jani inī ni jā íyó vāha jā sndíhvī inī ni ndá nú mitan técu cā ni, tácu nūcūhun inī nū.

¹⁴Chi maá Jētohō ō Jesucristo nī ncachī tūhun yā nūū ni jā má cútecū nahán cā ni ñayiví yáhá.

¹⁵Jā ñúcuán cúu jā ndúcú ndéé cā ni sndíhvī inī ni ndá nú, tácu tá ja nī jīhī ni, de níní nūcūhun inī nū ndācá tūhun yáhá.

Jā ní jini ndá dē jā cúñáhnú Cristo

¹⁶Tá nī stéhēn ndá nī tūhun maá Jētohō ō Jesucristo nūū ndá nú, nāsa nenda yā jín poder yā, de nduú ní ncāhān ndá nī iin cuento-ni jā ní ntavā ndichí nchivī. Chi tá nī iyo ndá nī jín yā xīnī yūcú, de nī jini jínúū ndá nī jā ñáhnú nī nduu yā.

¹⁷Chi nī jini ndá nī jā Tatá ó Yāā Dios nī ncāhān yíñúhún yā jín Jesús, de nī nsāhá ñáhnú yā Jesús. Chi ichi andiví nī nquiji tūhun vii, nī ncāhān Yāā Dios: Yáhá cúu Sēhe nī jā mānī ndasí nī jín, de cúsiī inī nī jín, ncachī yā.

¹⁸De nī jini ndá nī tūhun ñúcuán jā ní ncāhān ichi andiví, chi nī iyo ndá nī jín maá Jētohō ō xīnī yucu iī ñúcuán.

¹⁹De súcuán jini ō jā íyó ndāā ndija ndācá tūhun jā ní ntee ndá tēe nī nacani tūhun yā jondē janahán. De vāha jā chuhun inī ndá nú ndá tūhun ñúcuán, chi suu cúu tá cúu iin luz jā stúu nūū neē, jondē tūu maá quivi jā nenda yā, de stúu yā inī ánō nū tá cúu nūū jéndūtē lucero.

²⁰De xihna cā ná jícūhun inī ndá nú jā nī iin tūhun jā cáhān tutū iī, nsūú jā ní jani inī iin tēe súcuán-ni cúu.

²¹Chi ndācá tēe ndoo jā ní nacani tūhun yā jondē janahán, nduú ní nacani cuiti dē tūhun jā cúu inī maá dē. Chi sa nī nacani dē tūhun Yāā Dios jā ní stéhēn Espíritu Santo nūū dē.

Siqui ndá tēe jā stéhēn tūhun stáhvī

(Judas 4-13)

2 ¹De māhñú nchivī Israel suni nī iyo ndá tēe jā ní nacani tūhun stáhvī. De suni súcuán coo sava tēe stéhēn tūhun stáhvī māhñú ndá nú. De squivi ndá dē tūhun stáhvī jā tiví nchivī sāhá. De mā cuétúhún dē maá Jētohō ō jā scācu yā dē, de súcuán sāhá dē jā ñamā tñū tāhvī dē.

²De cuāhā nchivī cuniquīn ji modo nēhén jā stēhēn ndá dē. De sāhā dē jā cāhān nēhén nchivī sīquī tūhun vāha yā jā cúu ichi ndāā.

³De sīquī jā ndíyo inī ndá dē xūhún, de candēē dē xūhún ndá nú sīquī tūhun stāhvī jā stēhēn dē nūū nū. De nduú quíxīn tūndóhó jā tānū tāhvī dē, chi jondē janahán ja íyó tūhun jā nenda yā sīquī cuāchi dē.

⁴Chi nduú ní nēe cáhnú inī Yāā Dios nūū ndācá ángel yā jā ní nsāhā cuāchi, chi sa nī ntaān yā infierno nūū yíndasī nūū neē, de núhnī jín cadena. De nī nchindasī yā jondē quivī jā sāhā ndāā yā sīquī.

⁵De suni nduú ní nēe cáhnú inī yā nūū nchivī janahán, chi sa nī scúun yā sāvī xēen sīquī nchivī nēhén ñúcuán. Chi maá-ni Noé, tēe nī nacani tūhun ndāā, nī scácu yā dē jín ūjā cā nchivī.

⁶De suni nī nenda yā sīquī cuāchi nchivī ñuū Sodoma jín ñuū Gomorra, de nī ncāyū ñuū ji nī nduu maá yāā-ni cā. De súcuan cúu ji iin ejemplo nūū ndá cā nchivī nēhén jā quiji cā.

⁷De nī scácu yā Lot, chi tēe ndāā nī ncuu dē, de nī ncucuécá ndasí inī dē nī jinī dē tiñu nēhén jā ní nsāhā nchivī nēhén ñúcuán.

⁸Chi tēe vāha ñúcuán nī ndeē dē mähñú ndá ji, de ndiquivī nī ncucuécá inī dē jā ní jinī dē de nī jini dē ndācá tiñu nēhén jā ní nsāhā ndá ji.

⁹Túsaá de maá Jētohō ō chi scácu yā nchivī jā chíñúhún nūū yā, de tú quiji tūndóhó sīquī ji. De chíndasī yā nchivī nēhén, tácu ndoho ji castigo quivī juicio jā sāhā ndāā yā cuāchi ji.

¹⁰De víhí cā sndóho yā ndá tēe sāhā tiñu téhén jā ndíyo nēhén inī dē, de cújéhe inī dē sīquī tiñu ndácu maá Jētohō ō. Nihīn ndasí inī ndá dē, de chūndeē inī dē sāhā dē jā cúnī ndá máá dē, de nduú yúhú dē cāhān nāvāha dē sīquī ndācá jā cúñáhnú nūū súcún.

¹¹De juni ndá ángel jā íñí nūū maá Jētohō ō, vísō cúñáhnú cā yā jín fuerza jín tiñu ndíso yā, de nduú cāhān nāvāha yā sīquī ndācá jā cúñáhnú ñúcuán.

¹²De ndá tēe ñúcuán chi cúu dē tá cúu quiti yúcu jā ní jēcōo tī jín modo maá tī, de táhvī ndá tī tácu nīhīn nchivī tī jā cahnī ji tī. Chi cāhān nēhén ndá dē sīquī ndācá jāá nduú jícūhun inī dē. De tá cúu nūū jíhī ndācá quiti ñúcuán, suni súcuan cuū dē.

¹³De jā ní sndóho ndá dē nchivī, suni súcuan nanihīn dē ndoho dē. De cúsiī inī ndá dē jín ndācá jā cútíndí inī dē jā ndíyo nēhén inī dē. De cúu ndá dē tēe quini jā sāhā tiñu jā cúcanoō nchivī. De jā ndútútú ndá dē jín nú vico nú, de níní cúsiī inī dē jín tiñu nēhén tiñu stāhvī.

¹⁴De ndíyo inī ndá dē jínī dē ñahan, de nduú jécuiñī dē jā sāhā dē cuāchi. De stāhvī ndá dē nchivī tayā inī. Chi nī ncāan ndá dē jín tūhun ndíyo inī dē ndācá ndatíñú. De tēe jā tānū tāhvī cúu ndá dē.

¹⁵Chi nī nsana ndá dē, chi nī sndóo dē tūhun jā cúu ichi ndāā. De nī niquīn ndá dē modo Balaam, tēe nī nacani tūhun jondē janahán, sēhe Beor. Chi

tēe ñúcuán nī ncusiī inī dē jā nīhīn dē xūhún sīquī tūhun néhén jā cāhān dē nīcu.

¹⁶De iin burro nī ncāhān tī tá nūū cāhān iin nchivī, vísō nduú cúu cāhān tī. De nī ncāhān tī nūū tēe ñúcuán, de súcuán nī jasī tī jā má quíhīn dē cāhān dē ndācā tūhun néhén stáhví.

¹⁷De ndá tēe jā stívī ndasí súcuán, chi cúu dē tá cúu ntesócó jā ní nchīchī, jíin vīcō jā stéchī tāchī. De ja íyó tūha nūū neē ndasí nūū cundeē dē níí cání.

¹⁸Chi ndasí sáhá vīxī ndá dē maá dē jíin tūhun jā cāhān cāhá dē. De ndúcú ndá dē squívi tucu dē sava nchivī nūū tiñu néhén tiñu ndíyo inī. De súcuán stáhví dē nchivī jā cáta nī nquee jī nī ncācu jī nūū nchivī sáhá tiñu néhén.

¹⁹De cāhān ndá dē jā íyó libre jī jā cuu sáhá jī nāsa-nī cúnī maá jī, de juni maá dē chi nduú íyó libre dē, chi cúu dē mozo nūū cuāchi, chi cúsa maá tiñu téhén sáhá dē. Chi ndācā tiñu jā cundeé jíin iin tēe jā sáhá dē, suu ñúcuán ndúu dē mozo nūū.

²⁰Chi tú ja nī jinī ndá dē nāsa Yāā cúu maá Jētoho ō Jesucristo, Yāā jā scācu yóhó, de tú súcuán nī nquee dē nī ncācu dē nūū tiñu téhén jā íyó inī ñayiví, de tú ndivī tucu ndá dē nūū tiñu ñúcuán jā cundeé tucu jíin dē, túsaá de néhén cā quendōo dē jā sándihí nsūú cā jā xíhna ñúhún.

²¹Chi vāha cā tú nduú ní jinī dē ichi ndāā nīcu, nsūú cā jā ní jinī dē, de sndóo tucu dē tiñu ndoo jā ní ndacu yā nūū dē.

²²Chi nī ncundaā sīquī dē tá cúu nūū cāhān iin tūhun janahán: Tinā nī nacajī tī jā ní nujan tī. De quini jā ní ndundoo, nī nacuchi tucu tī ndēhyū, cāchī.

Siqui jā nenda maá Jētoho ō

3 ¹Ñanī mánī, yáhá cúu carta ūū jā tēe nī nūū ndá nú. De jíin ndúū carta yáhá cúnī nī jā nacani inī nū sīquī ndihi jā vāha jā ndāā jā jáni ichí nī ndóhó.

²De nūcūhun inī nū ndācā tūhun jā ní nacani ndá tēe ndoo jondē janahán, jíin tiñu jā ní ndacu maá Jētoho ō, Yāā jā scācu yóhó. De suu cúu jā ní stéhén ndá tēe apóstol nūū nū.

³De xihna cā tūhun yáhá ná jícūhun inī ndá nú: Jā tá cuāndihi quivī de quiji ndá tēe jā sáhá catá sīquī tūhun ndāā yā, chi sáhá dē ndá tiñu néhén jā ndíyo inī maá dē.

⁴De cāhān ndá dē: ¿Nājēhē cúu jāā nduú ndíji Cristo tá cúu nūū ní nquee yuhú yā? Chi jondē quivī jā ní jīhī ndá ndíyi tatā ō de jondē mitan, de nduú sáma cuitī ndihi jā íyó tá nī jēcōo ñayiví, cachī ndá dē.

⁵Chi nduú cúnī ndá dē jícūhun inī dē jā jondē janahán nī ncuvāha andiví jíin tūhun jā ní ncāhān-nī Yāā Dios. De nī ndacu yā tiñu jā ná cúvāha ñayiví jíin ndute, de mähñú ndute nī nquenda ñuhun yíchí.

⁶De suni jín ndute nī naā ñayiví janahán, chi nī ndaa ndute jā ní ncuun sāvī xēn.

⁷De suni súcuan jín tūhun jā ní ncāhān Yāa Dios de nī nsāhá tūha yā jā cāyū andiví jín ñayiví jā íyó mitan. Chi maá quiví juicio de cāyū ndihi, de tñū tāhvī nchiví nēhén.

⁸De suni mā náa inī ndá nú tūhun yáhá, ñanī mánī: Jā nū maá Jētohō ō chi iin-ni quiví cúu tá cúu mil cuiyā, de mil cuiyā cúu tá cúu iin-ni quiví.

⁹De nsūú jā cúcuéé inī maá Jētohō ō sīquī tūhun jā ní nquee yuhú yā jā nenda yā, tá cúu nū jāni inī sava nchiví. Chi sa íyó paciencia inī yā nū ō, chi nduú cúnī yā jā tñū tāhvī ni iin ó, chi sa cúnī yā jā ndihi ó nacani inī ō jā sndóo ó cuāchi ó.

¹⁰De quiví jā nenda maá Jētohō ō, iin sanaā-ni quenda, tá nū cúu jā iin sanaā-ni quenda jācuīhná jacuáa. De quiví ñúcuán chi nihin ndasí andiví, de naā-ni. De ndihi jā íyó andiví chi naā sāhá ñuhūn. De ñayiví jín ndācā jā íyó inī, ndihi cāyū.

¹¹De tú súcuan naā ndācā ñúcuán, de cánuú ndasí jā coo ndoo ánō ndá nú de chiñúhún vāha nú yā.

¹²De cundetu nú de cundihvī inī nū jā ná quíji ñamā quiví nenda Yāa Dios. De quiví ñúcuán cāyū andiví de naā-ni. De ndācā jā íyó chi ndute sāhá ñuhūn.

¹³De maá ó chi ndétu ó andiví jéé jín ñayiví jéé, chi súcuan nī nquee yuhú Yāa Dios jā coo. De ñúcuán chi maá-ni tiñu ndāa jín tiñu vāha coo.

¹⁴Túsaá ñanī mánī, juni ndétu ndá nú jā quee ndaa ndācā tiñu yáhá, de nducú ndéé nú tácuá tá nenda yā de nīhīn yā ndá nú jā ndéē mānī nū jín táhán nú, de coo ndoo nú jāa nduú nā cuāchi nú.

¹⁵De ná jícūhun inī ndá nú jā síquī jā íyó paciencia maá Jētohō ō, jā ñúcuán cúu jā cācu ó. Chi hermano ō Pablo jā mānī ō jín, suni súcuan nī ntee dē nū nū, chi súcuan nī stēhēn Yāa Dios tūhun ndíchí yā nū dē.

¹⁶De cáhān dē síquī tūhun yáhá nū ndācā carta jā ní ntee dē. De nū ndá carta dē ñúcuán chi íyó jacū tūhun jā vījín jícūhun inī ō. De ndá nchiví jāa nduú jícūhun inī jín nchiví jāa nduú jíja jín tūhun cándíja, chi násāma ji modo jā cáhān ndá tūhun vījín ñúcuán, tá cúu nū násāma ji jā cáhān sava cā tutū īi. De súcuan sáhá ji jā tñū tāhvī maá ji.

¹⁷De ndá ndóhó ñanī mánī, mitan de ja nī jinī nū nāsa coo ndācā tiñu yáhá. Túsaá de coto nú maá nú jā má cúniquīn nū tūhun stáhví jā stēhēn ndá tēe nēhén ñúcuán jāa nduú jétáhví dē yā. Chi tú nduú de snāa nū tūhun jā íní nīhīn nú jín.

¹⁸Chi sa cundihvī cā inī nū jā jícūhun inī nū nāsa Yāa cúu maá Jētohō ō Jesucristo, Yāa scácu yóhó. De ná cúja cā inī nū jín tūhun cúndáhví inī yā ndóhó. De ná cáhān ō jā viī ndasí cúñáhnú yā jondē mitan jín ní cání. Súcuan ná cóo. Amén.